

Na osnovu člana 112. Zakona o visokom obrazovanju („Službene novine TK“, broj 07/16, 10/16, 05/17) i na osnovu člana 35. Statuta Visoke škole za finansije i računovodstvo FINra Tuzla, Senat Visoke škole Finra na svojoj 14. redovnoj sjednici, održanoj dana 03.06.2018. godine, donosi

# **PRAVILNIK O DISCIPLINSKOJ I MATERIJALNOJ ODGOVORNOSTI STUDENATA**

## **I OPŠTE ODREDBE**

### **Član 1.**

Pravilnikom o disciplinskoj i materijalnoj odgovornosti studenata (u daljem tekstu: Pravilnik) utvrđuju se i regulišu prava i obaveze studenata, mirovanje prava, povreda prava i disciplinski postupak, sastav i postupak Komisije za disciplinsku odgovornost studenata, kvalifikacija disciplinskih povreda, odgovarajuće disciplinske mjere i druga pitanja na Visokoj školi za finansije i računovodstvo FINra (u daljem tekstu: Visoka škola).

### **Član 2.**

Odgovornost iz ovog Pravilnika može biti:

1. Disciplinska, usljed povrede obaveze/discipline studenta, i
2. Materijalna/naknada štete, kada je prouzrokovana šteta.

Odgovornost iz stava 1. ovog člana temelji se na krivci učinioca (subjektivna odgovornost).

### **Član 3.**

Služba za pravne poslove Visoke škole obavlja sve stručno tehničke i administrativne poslove vezane za disciplinsku odgovornost i prouzrokovanje štete od strane studenata.

Ukoliko određena pitanja nisu riješena ovim Pravilnikom, supsidijarno se primjenjuju Opšta pravila o imovinskoj i krivičnoj odgovornosti i pravila Zakona o upravnom postupku.

## **II PRIMJENA PRAVILNIKA**

### **Član 4.**

#### *1. Lica sa statusom studenta*

Pravilnik se primjenjuje na fizičko lice koje na Visokoj školi ima status:

- a) Redovnog studenta na dodiplomskom studiju; i

- b) Vanrednog studenta na dodiplomskom studiju.

Status studenta dokazuje se javnom ispravnom (indeksom) koji izdaje Visoka škola.

## *2. Lica koja nemaju status studenta*

Lice, koje u smislu ovog Pravilnika, nema status studenta, a izvrši prekršaj Pravila ponašanja vezanih za studiranje koja su utvrđena Zakonom i aktima Visoke škole, primjenjuju se opšta Pravila o krivičnoj i imovinskoj odgovornosti koja važe u Federaciji BiH.

Protiv lica iz stava 1. ovog člana Pravilnika, Visoka škola podnosi prijavu nadležnom državnom organu.

## **III PRAVA I OBAVEZE STUDENATA**

### **Član 5.**

Student ima pravo i obavezu da studira po usvojenim i odobrenim pravilima studiranja i nastavnom planu i programu, te da bude ispitivan i ocjenjivan u skladu sa pravilima koja su transparentna, pravična i dostupna svakom studentu.

Prava i obaveze iz studentskog standarda su lična i neprenosiva.

#### **1. Prava studenata na Visokoj školi su sljedeća:**

- a) Pravo prisustvovanja na svim oblicima izvođenja nastave;
- b) Kvalitetan nastavni proces u skladu sa odobrenim nastavnim planom i programom;
- c) Tačno i blagovremeno informisanje o svim pitanjima koja su vezana za studij;
- d) Ravnopravnost u pogledu svih uslova studija i tretmana na Visokoj školi, kao i povlastica koje nosi status studenta;
- e) Pravo na zdravstvenu zaštitu u skladu sa zakonom;
- f) Različitost i zaštitu od diskriminacije;
- g) Slobodu mišljenja i iznošenja ličnih stavova, a koji su u vezi sa nastavnim sadržajem;
- h) Korištenje biblioteke i drugih usluga dostupnih na Visokoj školi;
- i) Konsultacije i pomoć akademskog osoblja u savladavanju nastavnog sadržaja;
- j) Evaluacija rada akademskog osoblja;
- k) Osiguravanje mobilnosti, koje se postiže priznavanjem i prenosom bodova između visokoškolskih ustanova;
- l) Sudjelovanje u radu studentskih organizacija;
- m) Sudjelovanje u radu i odlučivanju tijela visokoškolske ustanove u skladu sa zakonom;
- n) Zaštita u slučaju povrede prava zagarantovanih zakonom ili opštim aktima Visoke škole;
- o) Druga prava predviđena Statutom ili drugim opštim aktima Visoke škole.

#### **2. Student ima sljedeće obaveze:**

- a) Ispunjavati nastavne, finansijske i druge obaveze studenata;
- b) Ispunjavati obaveze utvrđene Ugovorom o studiranju;

- c) Pridržavati se propisanih pravila studiranja Visoke škole;
- d) Uredno izvršavati svoje studijske obaveze i učestvovati u akademskim aktivnostima;
- e) Iskazati poštovanje prema pravima akademskog i neakademskog osoblja i pravima drugih studenata na Visokoj školi;
- f) Poštivati kućni red, Kodeks poslovne etike i ponašanja kao i druge akte Visoke škole;
- g) Student je obavezan da prijavi disciplinske povrede studenata i zaposlenika, kao i prouzrokovanu štetu Direktor Visoke škole.

### **3. Mirovanje prava i obaveza studenata**

#### **Član 6.**

Prava i obaveze studenata miruju u slučajevima utvrđenim zakonom i Statutom Visoke škole. Samo u izuzetnim slučajevima Visoka škola može na zahjev studenta odobriti mirovanje prava i obaveza u periodu ne dužem od jedne godine, ako za to postoje opravdani razlozi.

Opravdani razlozi iz stava 1. tačke 3.ovog člana su sljedeći:

- a) Trajanje teške bolesti;
- b) Trajanje porodijskog odsustva;
- c) Drugi slučajevi utvrđeni Statutom ili opštim aktima Visoke škole.

Postojanje ovih razloga student dokazuje dokumentovanim dokazima izdatim od nadležnih službi, licu iz Službe za pravne poslove.

Student kojem ne miruju prava i obaveze, a koji ne upiše narednu godinu, odnosno ne obnovi upis u istu akademsku godinu, izjednačava se sa statutsom studenta koji se ispisao sa Visoke škole.

### **IV POVREDA OBAVEZA/DISCIPLINE STUDENATA**

#### **Član 7.**

##### **1. Mogućnost pokretanja postupka**

Protiv studenta se može pokrenuti disciplinski postupak u smislu ovog Pravilnika, u slučaju prekršaja pravila utvrđenih zakonom, opštim aktima Visoke škole i ugovorom o studiranju, samo ukoliko je taj prekršaj predviđen kao lakša ili teža povreda obaveza (discipline) studenata za koju je propisana odgovornost studenata.

#### **Član 8.**

##### **2. Lakše i teže povrede obaveze (discipline) studenata**

Pod lakšim povredama obaveza studenata podrazumijeva se:

- a) Dolazak na predavanje, vježbe i druge oblike nastave sa zakašnjenjem ili neopravdanim odlaskom prije završetka;

- b) Nedolično ponašanje na Visokoj školi ili neprimjeren odnos prema akademskom i administrativnom osoblju i drugim studentima Visoke škole;
- c) Prouzrokovanje manje materijalne štete na predmetima u vlasništvu Visoke škole ili u vlasništvu drugih lica u okviru projekta Visoke škole;
- d) Ponašanje koje narušava ugled Visoke škole, studenata, akademskog i administrativnog osoblja Visoke škole;
- e) Dolazak u neprimjerenoj garderobi na nastavu u Visokoj školi;
- f) Ometanje nastave i ispita, sastanaka i drugih događaja organizovanih na Visokoj školi;
- g) Prijavljivanje ispita za sebe ili drugoga za ispitni rok, koji u pravilu student nema pravo da polaže;
- h) Pisanje ili crtanje sadržaja ili postavljanje banera i postera unutar i oko objekta Visoke škole, na mjestima koja nisu predviđena za to i bez odobrenja Visoke škole;
- i) Druga ponašanja studenata suprotna akademskim načelima ponašanja, a koja se mogu svrstati pod lakše povrede obaveza.

### **Član 9.**

Pod težim povredama obaveza studenata podrazumijeva se:

- a) Falsifikovanje isprava, naročito javnih isprava Visoke škole;
- b) Neispunjavanje obaveza utvrđenih Ugovornom o studiranju, naročito neispunjavanje finansijskih obaveza prema Visokoj školi;
- c) Davanje neistinitih podataka organima i licima Visoke škole;
- d) Prepravka ili dopisivanje podataka u evidencijama koje vodi Visoka škola;
- e) Iznošenje netačnih informacija o radu i poslovanju Visoke škole;
- f) Nedozvoljeno umnožavanje autorski zaštićenih tekstova, plagijat, direktno citiranje, parafriziranje ili prepričavanje bez navođenja autora i djela;
- g) Krađa;
- h) Izazivanje nereda ili tuče, učestvovanje ili pozivanje na iste unutar i oko objekta Visoke škole;
- i) Izražavanje nacionalne, vjerske, etničke i druge netrepeljivosti u okviru objekta Visoke škole;
- j) Nepridržavanje sigurnosnih propisa i pravila na Visokoj školi, ulazak u prostorije Visoke škole kojima je ulaz zabranjen;
- k) Prouzrokovanje veće materijalne štete na predmetima u vlasništvu Visoke škole, ili u vlasništvu drugih lica u okviru Visoke škole;
- l) Dolazak na Visoku školu u alkoholiziranom ili opijenom stanju i/ili upotreba alkohola i narkotika unutar i oko objekta Visoke škole;
- m) Podstrekavanje i pomaganje studenata pri konzumiranju alkohola i narkotika, trgovina, raspolaganje kao i posjedovanje istih na Visokoj školi;
- n) Osnivanje formalne ili neformalne organizacije ili nekog drugog pravnog lica unutar Visoke škole, ili pod imenom Visoke škole bez dozvole nadležnog tijela Visoke škole, kao i učešće u aktivnostima istih;
- o) Unošenje oružja i eksplozivnih naprava na Visoku školu;

- p) Pisanje ili crtanje neprimjerenih sadržaja na bilo kojoj površini unutar i oko Visoke škole, uništavanje postavljenih banera, obavještenja i natpisa;
- q) Varanja na ispitu, odnosno polaganje ispita protivno pravilima studiranja;
- r) Verbalno i svako drugo vrijeđanje akademskog i administrativnog osoblja, drugih studenata, kao i svih drugih lica na Visokoj školi;
- s) Neredovno učestvovanje u nastavi kao i neopravdano odsustvovanje;
- t) Učestvovanje u projektima izvan Visoke škole, bez prethodne saglasnosti nadležnih organa Visoke škole, ako je za takvo učestvovanje neophodna saglasnost Visoke škole;
- u) Nepostupanje po rješenju o obavezi nakande štete;
- v) Ponovno činjenje lakše povrede obaveze nakon izrečene opomene ili javne opomene za prethodno učinjenu lakšu ili težu povredu obaveze (discipline);
- w) Drugi vidovi ponašanja suprotni akademskim načelima, a koji se mogu svrstati pod teže povrede obaveza, odnosno za one za koje je previđena prekršajna ili krivična odgovornost u skladu sa zakonom.

### **Član 10.**

#### **3. Svojtvo u izvršenju povrede obaveze**

Povredu obaveze student može učiniti u svojtvu:

- a) Izvršioca ili saizvršioca (više lica);
- b) Podstrekača;
- c) Pomagača;
- d) Prikrivača.

Svojtvo lica kao i stepen krivice istog utvrđuju se u postupku predviđenim ovim Pravilnikom.

### **Član 11.**

#### **4. Mjesto izvršenja povrede obaveze (disciplina)**

Povreda obaveze (discipline) može biti učinjena:

- a) Bilo gdje u okviru prostorija Visoke škole;
- b) U prostorijama ili ispred prostorija Visoke škole u kojima se izvodi nastava;
- c) Na svakom drugom mjestu, ako se preduzetim radnjama narušava ugled Visoke škole, ugled drugog studenta ili drugih studenata, akademskog i administrativnog osoblja Visoke škole;
- d) Na svakom drugom mjestu ako se preduzetim radnjama namjeravalo steći neko pravo na protivpravan način ili protivpravna imovinska korist.

## Član 12.

### 5. Vrijeme izvršenja povrede obaveze (discipline)

Postupak utvrđivanja odgovornosti za povrede obaveze (discipline) studenta može se pokrenuti samo protiv osobe koja je u vrijeme učinjenja imala status studenta.

## V DISCIPLINSKE MJERE I NAKNADA ŠTETE

### Član 13.

Disciplinske mjere za povredu obaveza/discipline su:

1. Opomena, koja se izriče za lakšu povredu obaveze (disciplina) iz člana 8. Pravilnika;
2. Javna opomena, koja se izriče kada je student istovremeno ili u kratkom roku učinio više lakših povreda;
3. Isključenje s Visoke škole, može se izreći samo za težu povredu obaveze, i to u trajanju od 1 (jedne) do 3 (tri) akademske godine.

Izrečena mjere opomene izvršava se na taj način što se konačna odluka uručuje studentu.

Izrečena mjera javne opomene izvršava se isticanjem konačne odluke na oglasnoj ploči Visoke škole.

### Član 14.

Posebne mjere koje se izriču za povrede obaveze studenata su:

1. Udaljenje sa ispita, posebna mjera koju izriče predmetni nastavnik ili ovlaštena osoba koja nadgleda tok ispita u slučaju da nedvosmisleno utvrdi da student vara na ispitu, što predstavlja težu povredu obaveze/discipline. U ovom slučaju obavezno je povući i poništiti predmetni rad i o tome podnijeti izvještaj Direktor u eventualnom pokretanju disciplinskog postupka. Direktor može izreći disciplinsku mjeru „Opomena“ ili Javna opomena“ bez vođenja formalnog disciplinskog postupka. U slučaju prvog varanja na ispitu student će dobiti 0 bodova na istom. Kod drugog pokušaja varanja, student će dobiti finalnu ocjenu „F“ iz datog predmeta, a u slučaju trećeg pokušaja, disciplinska mjera „Javna opomena“ evidentirati će se u transkriptu studenta. Ako student u roku od jedne godine ne ponovi povredu obaveze/discipline, evidentirana mjera se briše iz transkripta.  
Ukoliko student smatra da je neopravdano udaljen sa ispita, ima pravo podnošenja žalbe u roku od 8 dana direktoru Visoke škole. U tom slučaju Direktor mora pokrenuti disciplinski postupak radi utvrđivanja činjenica vezanih za taj slučaj.
2. Mjere propisane drugim aktima, koje se mogu propisati drugim aktima Visoke škole, a koje se izriču u postupcima uređenim datim aktima. Na sva pitanja koja nisu uređena datim aktima primjenjuje se ovaj Pravilnik.

## **Član 15.**

### **Naknada štete**

Student odgovara za štetu prouzrokovanu na imovini Visoke škole ili u vlasništvu drugih lica, unutar i oko objekta Visoke škole.

Naknada prouzrokovane štete obuhvata prostu (stvarnu) štetu u visini stvarnog oštećenja, uključujući i odgovarajuće troškove.

## **VI POSTUPAK ZA UTVRĐIVANJE POVREDE OBAVEZE/DISCIPLINE**

### **Član 16.**

Student se smatra nevinim sve dok se konačnim rješenjem u disciplinskom postupku ne utvrdi njegova odgovornost.

Prijavu o učinjenoj povredi obaveze/discipline, dužan je, po saznanju podnijeti:

- Svaki student Visoke škole,
- Svaki radnik Visoke škole,
- Direktor, po službenoj dužnosti,
- Svako lice koje je angažovano na Visokoj školi.

Prijava se podnosi pismeno i usmeno i sadrži ime i prezime studenta ili studenata koji su počinili povredu obaveze, njihovu bližu identifikaciju, opis radnje i potkrepljujuće dokaze. Prijava se podnosi Direktor Visoke škole.

### **Član 17.**

Postupak za utvrđivanje odgovornosti pokreće Direktor Visoke škole u formi pismenog rješenja. Rješenje obavezno sadrži podatke iz člana 16. ovog Pravilnika. Rješenje se studentu uručuje lično putem Službe za pravne poslove Visoke škole uz obavezno uputstvo da može angažovati punomoćnika.

### **Član 18.**

Postupak za utvrđivanje odgovornosti studenata za učinjenu povredu obaveze/discipline pokreće se i vodi u sljedećim rokovima:

1. Za lakšu povredu obaveze/discipline, u roku od 6 mjeseci računajući od dana saznanja za učinjenu povredu ili prouzrokovanu štetu,
2. Za težu povredu obaveze/discipline, u roku od 12 mjeseci računajući od dana saznanja za učinjenu povredu ili prouzrokovanu štetu.

Apsolutni rok zastare za utvrđivanje odgovornost studenata za učinjenu povredu obaveze/discipline i prouzrokovanje štete jeste 12 mjeseci računajući od dana kada je učinjena povreda ili šteta prouzrokovana.

Ako učinjena povreda obaveze/discipline ima obilježja krivičnog djela, apsolutni rok zastare je onaj koji je određen krivičnim zakonom utvrđen za to djelo.

### **Član 19.**

Direktor zakazuje raspravu za utvrđivanje odgovornosti studenata za učinjenu povredu obaveze/discipline, i prouzrokovane štete.

Rasprava se zakazuje u protorijama Visoke škole u toku radnog vremena. Na raspravu se poziva student protiv koga je pokrenut postupak ili njegov punomoćnik kao i drugo lice čije je prisustvo neophodno.

Pismeni poziv za raspravu uručuje se studentu putem Službe za pravne poslove Visoke škole.

### **Član 20.**

Usmenu raspravu vodi Direktor Visoke škole ili lice iz Službe za pravne poslove Visoke škole koju ovlasti direktor. Rasprava se održava u prostorijama Visoke škole na dan i u vrijeme koje je naznačeno u pozivu.

Usmena rasprava se provodi na sljedeći način:

- Konstatovanje prisustva pozvanih lica i njihovog svojstva;
- Čitanje prijave;
- Davanje izjave studenta protiv kojeg se vodi postupak;
- Provođenje dokaznog postupka u koji se ubraja uvid u javne isprave, saslušanje svjedoka, saslušanje vještaka i sl.;
- Davanje završnih izjava studenta protiv kojeg se vodi postupak, kao i drugih lica koji učestvuju u postupku.

Ako se rasprava ne završi u toku jednog dana, novo ročište se zakazuje za drugi dan, ali ne u roku kraćem od 15 dana.

Na raspravi se vodi zapisnik u koji se unose svi relevantni podaci sa ročišta, a vezani za tok rasprave. Zapisnik vodi lice koje odredi Direktor.

### **Član 21.**

Odluka kojom se odlučuje o disciplinskoj mjeri i naknadi štete donosi direktor u formi Rješenja, u roku od 8 dana od dana održanog ročišta.

Rješenje sadrži sljedeće podatke:

1. Ime i prezime studenta protiv kojeg se izriče disciplinska mjera, i podaci o identifikaciji;
2. Opis učinjene radnje, mjesto, vrijeme i način izvršenja;
3. Vrsta disciplinske mjere i visina naknade ako je student proglašen krivim;
4. Obrazloženje Rješenja;
5. Pouka o pravnom lijeku i rok za podnošenje žalbe; i



6. Potpis Direktora, pečat Visoke škole, datum i broj protokola.

Ako je student oslobođen od odgovornosti ili je postupak o utvrđivanju odgovornosti obustavljen, izreka o tome se navodi u dispozitivu Rješenja.

Rješenje se studentu dostavlja lično putem Službe za pravne poslove Visoke škole, odnosno na način određen odredbama Zakona o upravnom postupku.

Protiv Rješenja iz stava 1. ovog člana student može, lično ili putem svog punomoćnika, izjaviti žalbu Upravnom odboru Visoke škole, kao drugostepenog organa, u roku od 8 dana od dana prijema prvostepenog Rješenja.

Upravni odbor prvostepeno Rješenje može: potvrditi ili preinačiti ili poništiti u cjelosti ili djelimično.

Odluka Upravnog odbora je konačna.

Za sva procesna pitanja koja nisu previđena ovim Pravilnikom, na postupak utvrđivanja odgovornosti studenta primjenjuju se odredbe Zakona o upravnom postupku.

#### **Član 22.**

O izrečenim disciplinskim mjerama i naknadi štete vodi se posebna evidencija, koju vodi lice iz Studentske službe Visoke škole.

### **VII PRELAZNE I ZAVRŠNE ODREDBE**

#### **Član 23.**

Ovaj Pravilnik donosi Senat Visoke škole.

#### **Član 24.**

Odluka stupa na snagu 8 dana od dana objavljivanja na Oglasnu ploču Visoke škole.

Broj: 2-19-1/18

Datum: 03.06.2018. godine

  
PREDSJEDAVAJUĆI SENATA  
Doc.dr. Ismet Kalić